



Este **sábado 11 de xuño** ADEGA reúne, no Salón de Actos da Deputación Provincial de Lugo das 9:30 ás 19:30 h, a persoeiros da cultura galega nunha xornada que leva por título

"Escritor@s polo Territorio"

. Os encargados de abrir este acto serán o Vicepresidente Primeiro da Deputación de Lugo en funcións, Antón Bao e a Presidenta de ADEGA Virxinia Rodríguez. O encontro de escritores/as está enmarcado na campaña

"Ponte no Medio. Móvete polo Territorio"

que está levando a cabo ADEGA ao longo deste ano através de accións culturais, reivindicativas e xurídicas pola defensa do noso Territorio e contra a desfeita especulativa.

"Ponte no Medio. Móvete polo Territorio" defende unha ordenación sustentable e unha alternativa posible de futuro. Baixa o [Díptico \(887 Kb\)](#) das xornadas.

O acto cultural deste **sábado 11 de xuño** tratará de tocar estes temas urxentes desde un punto máis literario a través dos ollos dos creadores e creadoras da nosa terra cunha visión cargada de lirismo e de arte vencellada inevitablemente ao territorio no que viven.

A primeira palestra, **"A literatura oral do territorio"**, analizará o mundo da nosa tradición oral máis anterga como elemento de conservación da identidade e do territorio das persoas que nel habitan. Os escritores Ana Carreira e Xoán R. Cuba serán neste caso os relatores desa nosa historia literaria oral, moderados por Antonio Reigosa.

Nunha segunda mesa de debate, **"Os nomes do territorio. A Toponimia"**, abordaranse os cambios na toponimia galega: nomes de cidades, pobos, parroquias e o mal uso que moitas veces se fixo destes ao longo da historia, calados e aldraxados por linguas alleas que mudaron a paisaxe territorial. Esta perspectiva da Tradición Oral, Arqueolóxica e Histórica será o tema no que intervirán os investigadores de toponimia Xulia Marqués e Gonzalo Navaza, moderados polo escritor Xosé Miranda.

A mesa de debate, “**Cambios no uso das cidades**”, estará representada por Paco Matín e María Reimóndez, acompañados de Isidro Novo, escritores de diferentes xeracións (1940, 1951, 1975) que contarán as súas vivencias e lembranzas da cidade. Será un relato costumbrista dos cambios no territorio nos últimos 75 anos.

O encontro estará amenizado pola coral LUGH, dirixida por Fernando García Jácome e por un grupo de música galega tradicional.

Para pechar a xornada, os autores como Pilar García Negro, Adela Figueroa Panisse e Xurxo Souto participarán na cuarta mesa titulada “**O meu territorio na miña literatura**”. O seu relato será un percorrido polas diferentes percepcións das cidades onde traballaron e viviron e os cambios que constatan esa sinerxia entre literatura e o espazo no que o autor ou autora elabora a súa obra.

A clausura destas xornadas dará paso as conclusións e o debate aberto entre escritores e achegados ao lugar.